

# Kerakyatan: Asri sokong kenyataan Datuk Musa

**KUALA LUMPUR, Jumaat** — Kongres Kesatuan Pekerja dalam Perkhidmatan Awam (Cuepacs) hari ini mengalu-alukan kenyataan Timbalan Perdana Menteri, Datuk Musa Hitam kerajaan tidak akan menerima semula bekas rakyat Malaysia yang telah menjadi warganegara asing.

Ketika menyatakan sokongan Kongres itu, Setiausaha Agung Cuepacs, Encik Jamaluddin Mohamad Isa berkata, langkah kerajaan terhadap perkara tersebut adalah bijak dan tepat.

"Orang-orang yang tidak menunjukkan taat setia kepada negara, tidak harus dibenarkan pulang dan diberi kerakyatan", tegas beliau.

## Meninjau

Menurutnya, mereka yang tidak sanggup bersusah payah dan melarikan diri ke negara lain ketika Malaysia menghadapi kesulitan, tidak boleh dibenarkan pulang semasa negara ini sedang mewah.

Encik Jamaluddin mensifatkan perbuatan orang-orang seperti itu sebagai tidak jujur dan hanya mementingkan faedah diri sendiri semata-mata.

Dalam kenyataannya semalam, Datuk Musa berkata Malaysia hanya memerlukan rakyat yang bersedia "hidup dan mati bersamanya" walau dalam apa keadaan sekalipun.

Beliau yang juga Menteri Dalam Negeri menegaskan, kerajaan tidak akan menimbang

permohonan orang-orang seperti itu untuk kembali menjadi warganegara Malaysia.

Yang Dipertua Agung PAS, Datuk Mohd. Asri bin Haji Muda pula, mensifatkan sikap itu sebagai baik pada dasarnya.

"Sikap seperti itu akan dapat menjamin kehormatan negara kita," tegas Datuk Asri.

"Walaupun demikian, kerajaan perlu juga meninjau kes-kes mereka yang memohon semula kerakyatan Malaysia.

"Kita terpaksa menilai masalah mereka masing-masing, sebelum membuat sebarang keputusan ke atas permohonan mereka," tambah beliau.

## Jalan ditutup untuk kerja pasang paip

**KUALA LUMPUR, Jumaat** — Sebahagian Jalan Kepong berdekatan dengan bulatan Jalan Kuching akan ditutup mulai 9.00 pagi esok hingga 6.00 pagi hari Rabu untuk memudahkan kerja memasang paip.

Menurut jurucakap Dewan Bandaraya hari ini, satu lorong disediakan bagi lalulintas dari Kuala Lumpur ke Kepong dan dari Kepong ke Kuala Lumpur.

Pengguna jalan raya dari Kuala Lumpur ke Kepong dinasihat menggunakan lencongan di depan Taman City Barat melalui Jalan Jambu Golok ataupun Lorong Jambu 3 melalui Jalan Jambu ke Kepong.